

TARIKH	13/2/2015	MUKASURAT	06
HARI	Jum AAT	RUANGAN	RENCANA

Minda Pengarang

Pantau harga selepas tarif elektrik turun

Keputusan kerajaan menurunkan tarif elektrik berkuat kuasa 1 Mac ini sehingga 30 Jun menyusuli penurunan harga bahan api adalah suatu langkah terbaru yang tentu mendapat sokongan rakyat. Mengikut Kementerian Tenaga, Teknologi Hijau dan Air (KeTTHA), penurunan tarif elektrik itu bakal dinikmati 32 peratus pengguna domestik yang menggunakan elektrik melebihi 300 kiloWatt sejam (kWj) dan pengguna komersial dan industri. Ia membabitkan pengurangan 2.25 sen/kWj bagi pengguna di Semenanjung dan 1.20 sen/kWj di Sabah dan Labuan. Sudah tentu pengurangan tarif ini bukan sahaja akan melegakan rakyat kerana dapat mengurangkan perbelanjaan isi rumah, bahkan diyakini dapat mengurangkan harga barang serta perkhidmatan kepada pengguna selepas ini. Pengurangan tarif ini sudah tentu mengurangkan kos pengilangan, sekali gus mendorong harga barang keperluan turut sama turun. Ia adalah suatu langkah proaktif kerajaan bagi mengurangkan lagi beban yang ditanggung sesebuah keluarga. Bagi pengguna domestik yang menggunakan lebih 300kWj dijangka menikmati pengurangan bil elektrik antara RM13.50 hingga RM45 sebulan. Walaupun kerajaan mempunyai perancangan untuk menstruktur semula subsidi dan mengukuhkan fiskal ketika harga minyak jatuh, langkah menurunkan tarif elektrik ini memberi sedikit kelegaan kepada perniagaan yang berdepan peningkatan kos.

Apa yang pasti, langkah KeTTHA sejajar dengan harapan Perdana Menteri, Datuk Seri Najib Razak yang komited mengurangkan kos menjalankan perniagaan dan bagi menggalakkan lagi pelaburan swasta dengan menangguhkan kenaikan tarif elektrik yang dijadualkan dan harga gas. Ini adalah sebahagian daripada rangka kerja kawal selia ekonomi yang dikenali sebagai Peraturan Berasaskan Insentif (PBI). Di bawah PBI, apa sahaja mengenai harga bahan api dan sebagainya akan dikaji semula setiap enam bulan dan ia tiada kena mengena dengan harga saham dan keuntungan asas Tenaga Nasional Berhad (TNB). PBI merangkumi dua komponen, iaitu kos berkaitan bahan api atau mekanisme pelepasan kos tidak seimbang (ICPT) dan tarif asas. Mekanisme ICPT membolehkan TNB memeta perubahan, sama ada kenaikan atau pengurangan kos bahan api yang tidak terkawal dalam tarif elektrik setiap enam bulan. Tarif asas pula dikaji semula setiap tiga tahun, mengambil kira kos TNB untuk menjana elektrik dan pendapatan yang sepatutnya diperoleh. Walau apa pun keadaannya, kerajaan selepas ini masih perlu serius memantau harga barang susulan penurunan tarif elektrik bulan depan. Ini penting kerana harga barang dan perkhidmatan belum menunjukkan sebarang tanda penurunan walaupun selepas harga bahan api turun. Kita berharap, pengguna terus yakin bahawa penurunan tarif ini adalah bukti keberkesanan pengurusan ekonomi oleh kerajaan.